



O le Vaiaso o le Gagana Samoa i Aotearoa 2023

UA TATOU iai i leni foi vaitau faitaulia o le kalena a'oga a Aotearoa Niu Sila, e faailoga ai la tatou leo e iloa ai tatou o ni tagata o se nuu ma se faasinomaga faaleaganuu.

O le autu filifilia, Mitamita i lau gagana; mautu lou faasinomaga. O loo tulituliloa ai pea le faamanatu i fanau ma matua, i le taua o le tatou gagana, a o aumau ai i nuu fou. Faapea mai se mau, ua sui tua'oi o le gagana ma le faasinomaga, ina ua malaga ese atu Samoa ma sii atu ai pine i isi vaipānoa o le lalolagi.

Ua matauina le lava tapena o Samoa i Aotearoa i soo se aai, i a'oga, le malo ma ekalesia foi, i lona faailogaina. O le agaga i e o loo taulamua, ina faasafua atu lea agaga lotonuu i soo se vaega o le kelope, e ave ai le faataua i la tatou gagana.

Faasoa o le Vaiaso:

O le taeao o le tautua a le lototele ma le lotonuu

A faitau mai i le 1962, ua laasia e Samoa le 60 tausaga o lana folauga o se malo.

O se malo tuto'atasi faanaponei ua mafai ona nonofo faatasi ai ona tagata i se taupulega ua malilie uma i ai. Ae e lei faigofie lona tauasaina mai, molimau le talafaasolo, aemaise lava ina ua aliali a'e isi foliga o le faakolone, na itea ai e nisi o tatou ta'ita'i le iuga, pe afai e nofoa'i pea.

Na itea le maumau o measina, e iai le leiloloa o fanua, le gagana, le suia o tu ma agaifanua i ni isi fou, aemaise o le sa'olotoga ma le pule. A aunoa ma na ua leai se faasinomaga ma se amana'ia.

Ae pei ona malie i nisi o faasoa, sa iai lava le Atua i le malaga a Samoa, a o lei taunuu le lotu Kerisiano, sa iloa lava lona aao faaola i taimi o puapuaga; i e na ia avatu i ai anava o le lototele ma le lotonuu.

O le Atua e le Vaaia, i le vao suafa ma faaaliga e tele, o lea lava na tapua'ia ma valo'ia. Sa iai ma Nafanua i lena fe'au lavea'i ina ua lagona mai i le lagi le mapu a le toea'ina Salafai; o le fe'au lea i le tala ia Tuna ma Fata, ma Ulumasui. O le fe'au fo'i lea mo Lauaki Namulauulu ina ua fousua measina a Samoa e Siamani.



TAEAO O LE ONOSEFULU: I le Malae i Ti'afau na sisi a'e ai le fu'a e le palemia o le malo o Samoa, Fiamē Naomi Mata'afa, o le ulua'i palemia tama'ita'i a Samoa. O le tasi lea tafa e fua i ai le mamao o le savaliga a Samoa. O se matat'ia mata'ina, pe a manatu i le tele o temokarasi e lei au ni tama'ita'i i nei tofiga. Ata Talanei.



Mata'afa, ma Holyoake, tuuina ifo tagavai pulega tuai

O le fe'au fo'i lea na lagonaina e ta'ita'i o le Mau a Samoa mo le Tuto'atasi, Samoa mo Samoa, o le vala'au mo le lavea'iina mai tiga ma sauaga o le puleesea e isi.

Ona o na puapuaga i pulega faakolone na tu a'e ai le malo sa'oloto o Samoa. O le ki lea, i le upu 'sa'oloto,'

sa'oloto e filifili ai e aunoa ma le faamata'uina, pe fai mea faalogologo i isi, pe paoina lana tofa e isi e le malamalama.

Talitonu e leai se Samoa e toe fia fo'i i le olaga o le puleesea e malo malolosi, se'i vagana ua toe fo'i le lalolagi i aga o pulega faakolone. Lea e manatu nisi e ono toe tupu po ua tupu lava i auala 'ailililo o le so'ona faalagolago pea i tupe a malo malolosi.

E le taumate 'ana faavaivai o tatou ta'ita'i ma tua'a, penei ua tatou tautatala uma i se gagana ese, tatou gaoioi uma i le pā'o o se faasinomaga ese. O lea e taua ai le talanoaga i le sa'olotoga, o le maa faavae lea, o le Atua lava lea sa galue i le loto ma le tauiviga—ananafi, le asō ma taeao.

Pei foi ona faia i soo se galuega faasa'oloto; e iai le gagana, ia faasa'olotoina mai i saisaitiaga o pulega faapitotasi, ma ia faaolaola pea. E iai le mativa, ina ia faalaugatasia tagata uma i se olaga fiafia ma faamalieina. E iai sauaga i aiga. E faitau ai nisi a tatou tu ma talitonuga tuai ua tataua ona faasa'oloto mai ai. O ni tafa uma na o le taua o le faasa'olotoina mai le pologa.

Ua 60 nei tausaga o le galuega faasa'oloto. O lea ua sii le laa muamua o le isi 60 tausaga o le sopo, e ta'imua ai i tatou uma, i ou tou faiva ma so matou tiute, e tautua ai Samoa i soo se tafa o le lalolagi. Ae manatu o le taeao o le 60, e mo e lototetele sa faitaulaga e gata ai mo le malo o Samoa.

Vaiaso o le Gagana 2023: Saunia e le FOTU O MALAMA, SAASIA & FAGASA

Mitamita i lau gagana, maua'a lou faasinomaga

O LE AUTU e faatatau ma faamamafaina la ta gagana Samoa. O le gagana o le faavae lea o le malamalama'aga o le tagata i le aganuu faapea foi o lona faasinomaga, o ia o le Samoa.

O le itu t'ua e lē na o le iloa ma malamalama i le gagana, a o le fa'aaogāina o le gagana e fesootai, ma tautatala ai i aso uma.

A faamāsani ma to'a'aga tagata e talanoa faasamoa, e le taumate le 'oa ma le tamāoaiga o lona silafia ma lona malamalama, ma o le a faapena foi ona maua'a ai lona faasinomaga, o ia o se tagata Samoa. Mitamita i lau gagana i aso anamua ae le'i taunu'u papālagi, sa iai lava talitonuga na fa'ata'oto e tua'ā ua mavae.

A o le gagana ma uiga o upu e aliali ma fa'amanatu mai ai le olaga ma le tōfā mamao na folasia e augatupulaga ua mavae.

O le gagana e momoli mai ai tala faasolopito o le foafoaga o le lalolagi mai le vaaiga, le mafauafau ma le fofoga o le Samoa.

Ia e mitamita i le gagana na fau ma totō e tua'ā ua mavae. Mitamita i lau gagana faaleagaga O Samoa ua ao i le Atua ma lana Talalelei. Ua fai ma faavae ma faamuamua ia Samoanalua. O le t'ua o le gagana o lo'o atagia i le Tusi Paia le mamana ma le mamafi o le gagana i le foafoaga o le lalolagi.

O le gagana Samoa, o le isi foi nei o poutu mālosi o ekalesia. O lo'o fa'atāuina le gagana tau Tusi Paia, ma o loo fa'afaiileina le gagana Samoa i totonu o a latou polokalame masani e pei o le Ā'oga Aso Sā, Ā'oga a le Faifeau, o le 'Autalavou, 'Aufaipese, fa'apea sauniga ta'itasi. O nei galuega uma, o le sao t'ua o fata faitaulaga 'ese'ese i le fa'aolaolaina o lau gagana, ma ia iloa ma mitamita ai le Sāmoa i lana gagana.

Mitamita i lau gagana i totonu o aiga O le gagana lava lea na foafoa mai i aiga le tautala ma le fa'aaloalo, talanoa ma le fa'aaloalo i tagata matutua ma soo se tasi. Ia iloa fai le valaau o mea'ai. A o mai foi nisi ma meaai, ia iloa folafola. O le uluai falea'oga lena a Samoa, na amata mai aiga, ae lei o'o atu i le nuu poo le fale o matai.

Afai ua mautu ma maua'a le malamalama o se Samoa i lana gagana, e faigofie ona malamalama i se isi gagana, ma fesoasoani foi i le ola laulelei o le mafauafau o soo se tasi. Afai ua mautu lana gagana, e le taufesiligia lona faasinomaga o le Samoa. O le mafuaaga, ona ua mautinoa i lona mafauafau e ala i le iloa ma malamalama, ae silisili e mafai ona ia talanoa faasamoa.

O le mitamita o le tagata i lana gagana e mua'i amata mai i lona aiga. Mitamita i lau gagana tusitusi e ui i le talanoa, a e iai foi suiga lelei ua vaaia i la ta gagana. O le siitia o le gagana mai le talanoa, i le tusitusi. O le isi itu maua'uga ua fa'apitoa foi le gagana e tusa ma se matafaioi ma tiute. O lona uiga, ua laasia la ta gagana se isi tulaga mao'a'e, ma ua amata ona maioio le gagana ina ia talafeagai ma lenei vaitau ma ona suiga.

O le gagana tusitusi o loo faatauina foi e a'oga, galuega, ekalesia ma soo se vaega o le olaga. E tatau ona iloa ma malamalama tagata ona faitau, fa'alogi, tautala, feso'ota'i atoa foi ma le tusitusi. Ia mitamita i le gagana tusitusi aua o suiga lelei ua la'asia e Samoa.



Fautuaga – Mitamita i lau gagana, maua'a lou fa'asinomaga. O le gagana e tele ona vaega ma laasaga. E iai gagana faigofie, e iai foi gagana faigata. E iai le gagana o aso uma, e iai foi le gagana fa'aaloalo. O le gagana faatamaititi ma gagana a tupulaga, atoa foi ma le gagana faafailauga po'o le gagana faamatai.

E uigalasi ma 'ānoa le gagana, e loloto toe tuusao foi le gagana. O loo faatāuina ma faamālosia e le autu o lenei tausaga, o le gagana e talafeagai ma le matua poo le gagana e malamalama ai le tamaititi. O le a lava le tulaga ua iai lou malamalama'aga i lau gagana, ia taumafai e fa'aolaola ma talanoa i ai i aso uma, e atagia ai lou mitamita i lau gagana ma e mautinoa ua maua'a le tino, mafauafau ma le agaga, i lou fa'asinomaga o oe o le Samoa.

The theme for this year's Samoa Language Week focuses on the importance of the Samoan language and identity. It impresses on us the need not only to understand the Samoan language, but to also use it as much as possible.

When you are proud of your language and can speak it, you will also be more grounded in your identity as a Samoan. Be proud of your ancestral language Before the arrival of early settlers to Samoa, our ancestors had their own beliefs.

Our ancestral language included symbols, signs, environmental landmarks, events, gestures and other intangible language. Therefore, the words of the Samoan language serve as a reminder of life from past generations and carries with it our histories and creation from the minds and mouths of Samoans.

Be proud of your language that was created and grown by our ancestors. Be proud of your spiritual language Samoa is founded God, and the Bible tells us of the importance of the Samoan language. The Samoan language is also a pillar in our churches and is nurtured in church programmes and activities such as Sunday School, Youth groups, Choirs and church services.

The church plays an important role in ensuring the Samoan language thrives, and that Samoan people are proud of their language. Be proud of your language in your families We are first taught in our homes how to speak and show respect to elders and others. You are expected to know how to invite people to eat, as well as know how to acknowledge gifts of food that people bring with them.

Therefore, the family is the first classroom for Samoans before they move into other spaces, such as in a village setting and council of chiefs.

When someone is grounded in their languages, it becomes easier to learn other languages, and it contributes positively to wellbeing. If you are strong in your Samoan language, you never have to question who you are as a Samoan, because you understand what it means to be Samoan, and most importantly, you can speak Samoan.

Pride in the Samoan language begins in the home.

Be proud of your written language We have seen changes to our Samoan language both in the spoken language, but also our written language. With the changing times, we are now seeing that our Samoan language is needing to adapt and change. Our written language is now becoming more valued in schools, workplaces, places of worship, and many other areas of our lives.

Therefore, we must be able to read, understand, speak and communicate in Samoan, especially being able to write Samoan. This is important for any Samoan for their education as well as in the workplaces and other duties on a day to day basis.

Be proud of your written language especially with the positive changes we are seeing with the Samoan language.

Words of encouragement – Be proud of your language and grounded in your identity.

The Samoan language has many components. There is simple Samoan, and there is more complex Samoan. There is everyday language and then there is respectful language.

There is language specific to young people, and then language that pertains to chiefs and orators. The Samoan language has depth.

This year's theme is encouraging all use of the Samoan language, from the language most fitting for young people, to the Samoan language used with adults and older Samoans.

Whatever stage you are at on your language journey, and how well you can speak and understand Samoan, it is important to continue to use it daily so that the Samoan language thrives. Only there will you be proud of your language, and only then will your identity as a Samoan be grounded in your mind, body and soul.

Asiasi fo'i i le tatou upega

**ola888.com mo se
fa'aopoopoga i lau faitau**

O SE LAUGA A TUI ATUA TUPUA TAMASESE EFI:

O tua'oi o le olaga ma le gagana i le mau a Samoa



ATOU te faafetaia le alofa o le Atua ua tatou aulia mai lenei taeao i le soifua laulelei.

Faafetai i le Ta'ita'i o le Sauniga Lotu ua muamua le taulaga i Matautu-aai e sufi le Atua i lona

alofa ma lana pule faasoa.

Faafetaia fo'i le alii Kovana ma le Sui Kovana ma le faigamalo a Amerika Samoa ona ua lautogia a'u e fai se upu i lenei taeao faitauina o le Malo ma tagata o Amerika Samoa.

E lē lau maua avanoa faapenei e lauga ai ia se Sui o se isi Malo i aso faapitoa o le isi Malo. Ma o le mea fo'i lea ou te lē utuvai tofo ai i lenei faaaloalo maualuga, Fai mai le lauga a se tasi Tamā o le atunuu, "Samoa, sa ou asiasi i le tulu'iga o Lagī ma Sa Lefe'ē e samo ai se faalumaga auā le taeao lenei".

Sa ou samo i le Tusi Paia ma o loo fai mai le Salamo 137: 5-6

"Ierusalem e, afai e galo oe ia te a'u, la galo lava i lo'u lima taumatau;

Afai ou te lē manatua oe, la pipii a'e lo'u laulaufaiva i lo'u gutu,

Pe a lē faasili Ierusalem i mea uma ou te fiafia i ai."

O le fesili, o ai Ierusalem? O Ierusalem o le nuu, o le tofi, o le 'ele'ele, o le tua'oi, o le tala faasolopito, o le tu ma le aga, o le gagana.

Le gagana lea fai mai le faitau a le Tusi Paia, "afai ou te lē manatua oe, ia pipii a'e lo'u laulaufaiva i lo'u gutu".

E matuiā le faa'upuga, "pe a ou lē manatua oe, pe a le faasili Ierusalem i mea uma ou te fiafia i ai, ia pipii a'e lo'u laulaufaiva i lo'u gutu" aua o le uiga, ia fano le gagana ma ia lafoa'i le fe'au e limata'ta'iina ai le mafaufau ma le agaga.

Mai fea le fe'au? Mai Lē afua mai ai le tofi ma le faasinomaga – na te momoli mai le fe'au i le mafaufau ma le agaga ona fa'aali lea e le laulaufaiva. O la e fai mai le Tusi Paia, na talanoa mai le Atua iā Atamu ma Eva, talanoa mai le Atua iā Aperaamo, talanoa mai le Atua iā Mose – i le ā le gagana? I le gagana Eperu.

E manino mai, e fia talanoa le Atua i tagata Eperu i le gagana Eperu. E fia talanoa le Atua i tagata Maori i le gagana Maori. E fia talanoa le Atua i tagata Samoa i le gagana Samoa. Aua o lana meaalofa totino lea i atunuu ta'itasi ma ona tagata.

Ae faapefea le laufanua? Ae a la e fai mai mātua, "o Samoa e pau mai Saua pau mai Analega". E 'anoa le laufanua pe afai e te iloa le tofi ma le faasinomaga o le laufanua, pe afai e te iloa le 'ele'ele faapea ai ma lona tua'oi.

Atili ona faamautūina le tofi, le faasinomaga ma le tua'oi, ona e mātua ona faaigoa le 'ele'ele o le fanua, ona o le 'ele'ele o la e tanu ai le fanua o lou tinā faapea ai lou pute.

O molimau ola ia o le tofi, o le faasinomaga ma le tua'oi.



Ma o le ala fo'i lea ua maualafia ai na fai atu sa'u upu i lenei taeao faitauina, aua e ui ina 'ese'ese faigamālō, ae ua lē aveā lenā e vaevaeina ai le tofi, le faasinomaga ma le tua'oi o tagata Samoa.

Pei ona fai mai le 'au matutua, o lau o la'u, o lou o lo'u, ona e tasi le 'afu'afu e āfua mai ai, tasi le gagana, tasi le tofi, tasi le faasinomaga. Auā o Samoa e mai Saua se'i pa'ia Analega.

Sa ou asiasi i le mau tuufaasolo a mātua, i le tapu e puipui ai le tua'oi o le tofi ma le faasinomaga. Fai mai mātua, "e le laa le uto i le maene, e le sopo fo'i le sami i le lau'ele'ele".

O le faafitauli aupito sili lea o loo feagai nei ma aiga, malo ma ekalesia, o le sopotua'oi. Ua sopotua'oi fanau i mātua, ua sopotua'oi le puletua i le pule, ua sopotua'oi le tagata i le Atua.

O le uiga o le upu "mala matuā" o le malaia e maua mai le fetuu a mātua. O se tasi o mau faavae o le aganuu a Samoa, o le manuia e maua mai le faamanuiaga a mātua. Ma a maua lenei faamanuiaga, e faasolo atu sosia o lena faamanuiaga i aiga, nuu, malo ma ekalesia.

E ao fo'i ona aafia i le sopotua'oi le lape o mātua. O loo faamaumauina i fuainumera a le Malo le sauāina e tamā o tinā ma fanau. Le afaina o fanau i le tuulafoa'i ma le tuufau e mātua.

O se molimau malosi o le solo o le falute, o faamaumauga a le Facebook – ua leai se vafealoaloa'i ma ua leai se tapu o le tua'oi.

E fia fai se tala i le molimau a mātua i le tua'oi e tapu ma mana. O le faatau i le lauga i le va o Pāsia o Safotulafai ma Lofipō o Sale'aula i le vaitau o le Mau ina ua lafo le lauga iā Pule (Savaii).

Na amata mea Lofipo i le faapea atu, "Sia, lauga oe". Tali mai Pasia, "Po, lauga oe". Ona faapenā lava lea ona fealoaloa'i se'ia oo ina malie mai Pasia na te faia le lauga. Faatusatusa le faaaloalo lea ma le gagana lea ua fai ai le faatau i nei onapō.

Ua sopotua'oi le tagata i le Atua

E mātua iseā le mala lea ua tula'i mai i le si'osi'omaga? E mātua ona ua sopo tagata i le matafaioi a le Atua. O le Atua o le āfuamea.

O Lē na faia le lagi ma le lalolagi. O le lalolagi o lana meaalofa i tagata. O le meaalofa na aumai e faaaogā tatau mo le manuia o tagata, ae le'i aumaia e faataugā ma faainaelo i ai talu ai le tu'inanau ma le faumālō.

Auā ua aveā lenei soonafai ma le faumālō, ua matuā afaina ai le tau. Ma ua valo'ia e saienisi, afai e lē fo'ia le faafitauli o le tau, e au ina fano le lalolagi.

O tapu sa puipui ai le vafeagai ai o le Atua ma tagata i le tatou gagana lauga, tatou te tautala soo i sa o Manuvao. O Manuvao o le Atua o le vao. E ao i le tagata e oia le vao pe ta le laau ona mua'i fai le taulaga i sa o Manuvao. Ua lē toe faia lea taulaga. A o se tasi lea o molimau e lē se Atua le tagata; o le tagata ua na o se tausimea o le meaalofa a le Atua i tagata, o le lalolagi lea.

O le molimau o le faatalatalanoaga a le Atua ma le tagata, e te maua mai lea i le a'e o le palolo. E faitau e tagata ia aga a le masina, e ta'u mai ai le vaitau e a'e ai le palolo.

A oo ina ta palolo, e lagi le sula "Fanau mai! Fanau mai!" O lona uiga e ta'u mai e 'upu o le sula, o loo latou iloa o loo a'e le palolo ma tuufua. O lea ua faamaonia e saienisi le a'e o le palolo ma le tuufua.

A o le fesili, faapefea ona iloa e tagata Samoa talanoa i le masina ona iloa ai lea o le vaitau e a'e ai le palolo? Faapefea ona iloa e tagata o lea e tuufua le palolo? E mātua ona sa malupuipua tua'oi o le faatalatalanoaga i le va o le Atua ma o tatou mātua.

Ola ma le Oti

O se tasi o tima'i malosi a mātua i fanau, ia e iloa ola ma ia e iloa oti. O se tasi o faailoilo o le tua'oi o le ola ma le oti, e te maua mai i upu ma tāga o sula o maliu.

E 'ave le faamuamua i le ola aua o la e fai mai ia upu ma taga o le sula, "Le Atua, ua e 'ave le tagata ae lē afaina auā e mafai fo'i ona ou fau le isi tagata".

O lona uiga ia tatou ave le mua i le ola. Fai mai se tasi tamā sa na ia faafailele a'u, le tōfā ia Soifuā Nese, o aso anamua, a oo ina ua malomaloā le soifua o se tagata iloga o le nuu, ona fale'esea lea ma tofia tagata faapitoa e o e tausi le gasegase i le fale'esea.

E mātua ina ia puipua mea ane ua afaina le mana. Ina ne'i mea ane e tūgā le gasegase ma aliali mai ai ni mea e ono faalumaluma tagata. O le agaga ia taofiofi se mea faapea e tula'i mai i totonu o le lotoifale o le aiga – 'aua ne'i pua'ina i fafo.

A e oo fo'i i le tagata gasegase e i ai lana fe'au tāua, o le a'oa'oina lea o ē tausia lona gasegase i aga ma amio e faafeiloa'i ai le oti. Ma maua ai fo'i ma le avanoa e faamatala ai e le gasegase le tofi, le faasinomaga, le tua'oi i le 'au gāsese ma le au tausi ma'i.

E fā'i la o le mau, a o lou olaina o le mau. Ina ua lamalama faai'u le soifua o le toeaina o Soifuā Nese, ona faatonu lea o tama e fau lona pusaoti. Ina ua mae'a ona avatu lea o lona pusaoti ua tuu i luga o le

O SE TAALOGA VAIASO O LE GAGANA:

SU'E LOU MALAMALAMA: TALA O SAMOA

Filifili le tali sa'o. Umi o le su'ega 10 minute.

- O ai le ulua'i tupu tafa'ifa?
A. I'amafana E. Valasi I. Salamasina
- O ai le ulua'i palemia o le malo tuto'atasi o Samoa?
A. Malietoa E. Fiame Mata'afa I. Tupua
- O ai le palemia lona 4 o Samoa tuto'atasi?
A. Vaai E. Tofilau I. Tupua Tamasese
- O le a le igoa o le vaa na aumaia le siama o le fulu Sepania i Samoa?
A. Tafune E. Tofua I. Talune
- O ai le ulua'i kovana Siamani i Samoa?
A. Sulusi E. Solofa I. Seleni
- O a tupe sa fa'aaoga i taimi o Niu Sila?
A. pauni E. maka I. tala
- O le a le tausaga na amata ai le pule a Siamani i Samoa?
A. 1900 E. 1800 I. 1914
- O le a le aso na tuto'atasi ai Samoa?
A. 1 Iuni E. 1 Ianuari I. 1 Tesema
- O le a le tausaga na faama'ite ai le mau o le tuto'atasi?
A. 1936 E. 1926 I. 1946
- O le a le tausaga na maliu ai Tupua Tamasese i pulufana a leoleo Niu Sila?
A. 1919 E. 1959 I. 1929
- Aisea na nofoia ai Samoa e fitafita Meleke?
A. faamata'u a Saina E. faamata'u a Iapani I. faamata'u a Siamani
- O le a le tausaga o le ulua'i malaga faavaomalo a se aufili lakapi Samoa?
A. 1976 E. 1989 I. 1955
- O le a le mala na feagai ma Samoa i le tausaga 1966
A. o se mafui'e tele E. o se galulolo malosi I. o se afā malosi
- O le a le tausaga na malilie ai malo pule e vaelua Samoa ia Sisifo ma Sasa'e?
A. 1899 E. 1900 I. 1889
- E fia itumalo palota a Samoa?
A. 51 E. 52 I. 55
- O le fea o suafa nei na mua i le tofi kapeteni i le Manu Samoa?
A. Fatialofa E. Lam I. Sititi
- O le a le mea na tupu i le 1992?
A. faama'i talo E. faama'i oti I. misela
- O le a le tausaga na tatala ai le palota i le 21?
A. 1991 E. 1992 I. 2001
- O le fea o mea nei na tupu i le 1994?
A. amata Televisi Samoa E. faamamalu VAGST I. Faamamalu le suiga o le igoa Samoa i Sisifo ia Samoa
- O ai le suafa o le kovana o Amerika Samoa o iai nei?
A. Mauga E. Lutali I. Tulafono
- O le a le F i le igoa o le vaega faaupufai FAST?
A. Faavae E. Faamoemoe I. Faatuatua
- E fia eka o le Vaomatua Faasao i Salafai na pasia i se tulafono i le 2004?
A. 5000 E. 12,000 I. 13,000
- O le a e ta'u ai le tautua a tagata Samoa mai fafo?
A. tuavae E. 'aitaumalele I. 'aitagi
- O le a o le a fai atu i Samoa i le 2024?
A. taaloga tele E. fono tele I. konseti tele
- O le fea o mea nei na mua'i tupu i le talafaasolo o Samoa?
A. taunuu misionare Egelani E. taunuu Pokenivili I. taunuu Rokeuaina

Siaki au tali i le itulau mulimuli (8)

Faai'uga Lauga Tupua

laulau i le ogatotonu o le fale. A alu ane lava le tagata i le auala e fia talanoa i ai Soifuā ona valaau lea "afe mai se'i fai se ta ti pe afe mai e taumafa se sua o le aoauli."

A mae'a ona fai atu lea o le toeaina. "Sau la ta o se'i o ta matamata i lo'u pusaoti." Ona o atu lea faamatamata ma fesilisili mai, "e ā, e manaia lo'u pusa?" A uma lenā, ona nofo lea ua tatala le pusa. Ona oso lea i totonu ma ta'oto ai ma fai mai. "O le ā sau vaai mai, e matuā fetui lelei si tama ma le pusa; e tautamalii le tama, a ea?"

O le fesili, o le ā le fe'au lea e momoli mai? O le fe'au muamua, ua ou sauniuni e faafeiloa'i le oti. E lē o se mea e amo pe fata auā o le oti o le 'avefe'au a le Alii, e ao ona tatou talia ma le to'afilemu ma le faaaloalo. O le uiga tonu lea o le tima'i a mātua, ia e iloa ola ma ia e iloa oti.

Na tuai ona maliu le toeaina, ae ina ua valaau le Atua ia te ia, ua soo ia itu e fa o Samoa i le tala'ave i le faaife a Soifuā Nese le tamaloa Falealupo.

FAAIUGA:

Ua lamalama faai'u le lauga. O le a tualuga le faasoa i upusii o le Salamo.

"Ierusalem e, afai e galo oe ia te a'u,
la galo lava i lo'u lima taumatau;
Afai ou te lē manatua oe,
la pipii a'e lo'u laulaufaiva i lo'u gutu,
Pe a lē faasili Ierusalem
i mea uma ou te fiafia i ai."

O le ute ma le aano o le atunuu ma le malo o Samoa, o le tofi, o le faasinomaga, o le gagana, o le tu ma le aga ma le tua'oi. Afai e galo le tofi, le faasinomaga, le tu ma le aga, ia galo lava i lo'u lima taumatau Afai e galo le gagana, le tala faasolopito ma le tua'oi, ia pipii a'e lo'u laulaufaiva i lo'u gutu, pe a lē faasili Samoa i mea uma ou te fiafia i ai.

Lau afioga a le alii Kovana, i lau tusi valaau, o loo e moomia se faasinoala mo tupulaga i le aga'i atu i luma.

Ma le faaaloalo, o la'u faasoa lenā mo sou alo ma sa'u fanau. Ia manuia le faamanatuina o le Sisigafu'a a le malo o Amelika Samoa!

Fa'autaga loloto

A e talanoa i se tagata i se gagana e malamalama ai, e alu lena i lona ulu; ae afai e te lua talanoa ma se tagata i lana gagana, e alu lena i lona loto.

— Nelson Mandela



Te Ope Whakaora

O le vaimasina lenei o le sailiga fesoasoani a le Salvation Army ia Niu Sila, e asia ai lou luma- fale pe logoina foi lau faauta i luga o auala o fesooota'iga faaneionapo. O le a se foa'i tupe e te mafaia e lagolago ai ana fuafuaga, e talia ma le faafetai. Faafesoata'i le telefoni 0800 53 00 00, pe asiasi i le Upega Tafa'ilagi salvationarmy.org.nz. Faafetai.

O NI MAU FAASAMOA ANAMUA: FAAMAUINA E MISI TANA

O le lagi ma mea o i le lagi



TALITONU tagata Samoa faapea o le lagi na palasi ma solofa i se tasi aso ma taomia ai tagata uma, ona fetolofi lea ma sosolo i le eleele e pei lava o meaola pito maulalo i mea na faia.

Na mavae ia aso ona tutupu ai lea o laau e i ai le masoā ma le veve ma laau faapena ma latou tetee le lagi i luga ma faaigoa ai le mea o Teegalagi. A e ui lava i lena e le mafai ona tutusa'o ia tagata, e taia o latou tumua'i i le lagi; fa'i foi o lena a e matua vevale tele ia le mea.

Sa ui ane se fafine ma vai sa alu e utuvai i le tasi aso, ona fai atu lea o se tamaloa ia te ia ia aumai ia te ia se'i inu a mole o ia i le fiainu, a e o le a na teena i luga le lagi ia matua maualuga lava ia le toe papa'i i ai se ulu o se tasi.

Fai mai le fafine i le tamaloa, "tetee muamua ia le lagi ona faato'a avatu ai lea o ni ou vai."

Ona tu ai lea o le tamaloa ua uuna'i i luga le lagi i ona tauau ma fai atu i le fafine po ua a lea, a e fai [mai] le fafine e le'i taitai lava; o lea na ia matua tulei ai i luga le lagi ma ua alu mamao ai i luga.

Ua mamao i luga le lagi ona avatu ai lea e le fafine ia vai ma le tamaloa.

A e faapea le tasi tala o le sau'ai tagata e igoa ia Tiitii na na tulei i luga ia le lagi. E iloga lelei le mea na tu ai o ia i luga o le papa; pe tusa o le ono futu le uumi o tulagavae.

E ta'u mai e uputuu faapea o aso la anamua sa feuu'a'i ai ia tagata ola ma le lagi. Ai lava na fatu nei tala i le manatu e fepiita'i faatasi ia le lagi ma le lalolagi i tafatafa'ilagi.

Na manatu latou e malolo ia le itu lea ma fesilia'i ai foi ia le lalolagi i le lagi; o le mea lea o se malaga e sii mamao i isi motu e faapea le taofi ua sii atu i nisi vaega o le lagi.

Ina ua oo mai ia tagata papalagi sa manatu ia tagata Samoa e o mai ia tagata ma o latou vaa mai le lagi. E oo mai i le asō e ta'ua ia tagata papa'e o papalagi, auā e tusa na papa mai le lagi.

A e fia maua mo mafaufauga ia ni mea faitino ma le mautu e faavae ai ia manatu. O lea e mafua ai ia le mau uputuu e faaali ai ia ala eseese na uia e tagata i lo latou femalagaa'i i luga o le lagi

faapea ma lo latou o ifo mai le lagi.

E faapea le tasi tala, o se laau mafala sa tu e oo lona tumutumu i le lagi. A o se tasi tala e fai mai o se asu faaniutu sa fe'a'ei ai tagata i le lagi.

O se isi tala o le laau lea pe onosefulu futu lona umi. E ta'ua le isi laau sa fai ma apefa'i, ma e faasolosolo ai ia manu taufeu i vaega eseese o le laau; e to'aitiiti lava ia tagata e sao mai i ia faalavelave.

Muamua lava ia le vaega e tumu i manufetolofi ma mogamoga, ona sosoo lea ma le vaega e tumu i loi; sosoo lea ma le vaega e ufitia e loipoto uogo; i tua atu o lena e faufausasaga ai ia atualoa. E sosola mai ai lava tagata mai le vaiga lena, ma e foi mai i le laueleele.



A uma atu ia le vaega o atualoa ona oo atu ai lea i nisi lala e le o i ai ni mea. O lala ia e tautau ai ia tagata ma faatalitali matagi lelei e feula ai latou i le lagi.

Sa tala'ina foi ia ni tala ofoofogia e uiga i le la e ui lava ina e le matua faigofie ona tatou talitonu i ai.

Na mamafa le isi fafine e igoa ia Magamagai i le isi aso ona o le tilotilo i le la a o oso a'e i le taeao. Na fanau o le tama na faaigoa ia Alo o le La. Na fai ava Alo o le La ona fai atu ai lea o ia i lona tina, "Sena e, a faapefea ea sa'u meaalofa i lo'u to'alua? O lena o le a oo mai le saga o le fafine a e faaleai sa'u mea e faafesuia'i."

Ona tuli ai lea e Magamagai lana tama o Aloolela i lona tamā. Na alu le tama ma le fuefue tele na ia saunia mai le togavao e fai ma ana sele; ona a'e ai lea o ia i se laau ma sele ai le la. Ona ta'u atu ai lea o lana feau i le la.

Sa fesili mai le la po o le a le mea e mana'o ai o ia pe o le malaia pe o manū. A e tali atu le tama, o "manū".

Na mavae lea ona toe sau ai lea o le tama ma lona oso e saisai mai i le ato.

A ua i ai foi le isi tala Samoa e fai i le tama o Maui le avekariota a le La. Na le malilie ia Maui ma lona tina ona o le saosaoa o le malaga a le la, e faigata ona uma se feau aemaise le faalalaina o a la ietoga ma iesina.

Fai mai e na ona oso a'e le la, pulou tonu i luga ma goto faavave. Ona a'e ai lea o Maui i le isi taeao po ma lana sele ma sele ai le la a o faatoa ala a'e o ia i tafatafa'ilagi i Sasa'e.

Na fiu le la i autafiti a e le mafai ona sola ese mai le matasele a Maui. Na fefe le la ina ne'i fai fai te'i ua mole, o lea na ia valaau mai ai ia Maui, "Se Maui ta fia ola, ta'u mai po o le a le mea e te mana'o ai. So o se mea e te fai mai ai o le a avatu lava."

Ona fai atu ai lea o Maui i le la, "Aua e te toe soona alu televave, e le mafai se feau ia te oe i lou faasaosaoa i sisifo."

A e tauapatā solo le la ua toetoe lava a mole i le sele a Maui, ona toe fai mai lea o ia, "Ia ua lelei o le a ou le toe alu televave i aso o totoe o lo'u olaga. A ia e alofa ma tuu mai ta ita."

Ona tuu ai lea e Maui lana sele a e faasola le la; e alu le la ma ua tausii lava si alii i lana upu ia Maui.

E avea le la ma lē e vaaia ia le gasolo o itula. E vavaeae ia le po i vaega e tolu ... vaeluapo, o le vivini muamua o moa ma le vivini faalausosoo o moa.

Ona sau ai lea o le la. E i ai le oso a'e o le la, o le tutonu o le la, o le tusipa o le la, ma le taugagaifo o le la, faapea ma le goto o le la.

E manatu latou, e malaga le la i lalo o le sami mai le itu i Sisifo ma mau i lalo o le vasa tele e manu a'e i le itulagi i sasa'e i le isi taeao.

E mata'utia tele ia le fenunua'i ma le vevale e vilia ai le suasami a o faimalaga le la i le itu i sasa'e. O lea e avea ma fetuu tele ia le faapea o se tasi, ia goto se isi i le vasa ma ia sosopo ai le la aasa i ona luga.

Faaliliu e Semisi Ma'ia'i

A'OGA SAMOA ONLINE

SAMOA ONLINE SCHOOL

O e sa'ilia se tautua
e fesoasoani i le a'oga
a lou alo poo oe fo'i?



SALĀ DR SAILI AUKUSO

MATOU TE OFOINA TAUTUA NEI:

- E lagolago fanau i le atina'e o tomai faavae i le tautala, faitau, tusitusi, malamalama i le gagana Samoa ma le gagana Peretania
- E fesoasoani i soo se tasi o loo fia faalelei ona tomai faavae literasi i gagana e lua
- E fesoasoani i meaa'oga a fanau i le fale pe a tu'ua le a'oga
- E lagolago soo se tasi i le tapenaga o ni pepa mo a'oga, sauni atu i su'ega poo ni fonotaga
- E lagolago polokalame a'oga i mataupu taugagana e lua, ma le silapasi a'oga Samoa—Niu Sila ma Samoa
- E fesoasoani i le atina'e o agavaa ma tomai mana'omia o tusitusiga ma su'esu'ega i le kolisi ma le iunivesite fo'i
- Ma ni isi fo'i ofo lelei mo oe

Fesoota'i mai loa i le

Telefoni: numera 02102567412; 0210364322

Meli: ola.aogasamoasonline.com; saili.niupac@gmail.com

Poo le Upega Tafa'ilagi: A'oga Samoa Online

Mai le tusiupu a Parate

FA'ASELEGĀ, v. to prowl about, as a man in the neighbourhood of his sweetheart, or in order to be asked to eat.

FA'ASELEMUTU, v. 1. to cut off a part. 2. To cut short, as a speech.

FA'ASELEVELI, v. 1. to intercept. 2. To interrupt a speaker. Syn. FA'AFELAVEI.

FA'ASEMAE, v. to call out Sema e !

FAASEMU, 8. the end of a mast.

FA'ASEPUSEPU. See MASEPUSEPU.

FA'ASESE, v. 1. to cause to go astray, to mislead. 2. To bring the head of a canoe to the wind so as to leave the sail flapping.

FA'ASETOA, v. to express sympathy by saying Setoa. See SETOA.

FA'ASEVASEVALOA, v. to be a vagabond.

FA'ASILASILA, v. to make known. A chief's word.

FA'ASIASIA, a. haughty, contemptuous.

FA'ASIASIA, v. to be haughty, to be contemptuous.

FA'ASIOA, v. to be faint, languid, exhausted.

FA'ASI'UGUTU, v. to talk to a person and look away from him, as in anger.

FA'ASI'ULA, v. to look askance, to dart angry glances.

FA'ASI'USI'UMATA, v. to look out of the corners of the eyes, as if expecting an attack.

FA'ASIFO, v. 1. to bow down in acknowledgment of being conquered; applied to chiefs instead of ifo. 2. To embrace Christianity. 3. To devote to destruction.

FA'ASIGANO, v. 1. to leave notches, as marks in cutting wood. 2. To make dovetail.

FA'ASILAFAI, v. to show, to direct. I ave efa'asilafa'i.

FA'ASAPISAPI, v. 1. to provoke, 2. To be saucy to relations. 3. Syn. with FA'ASAPILIMA.

FA'ASAPITAFAI, v. to behave haughtily, as the right-hand man of the king.

FA'ASASA, v. 1. to stand aslant. 2. To speak indirectly. Luafa'atia ma fa'asasa [le 'ava].

FA'ASASA'O, a. middling, neither fat nor lean. 2. Straight. 3. Faultless, physically.

FA'ASASAU, v. to blow the trumpet.

TALI O LE SU'EGA TALAAGA O SAMOA

- | | |
|------------------------|------------------------|
| 1. I Salamasina | 14. A 1899 |
| 2. E Fiame | 15. A 51 |
| 3. A Va'ai | 16. A Fatialofa |
| 4. I Talune | 17. A faama'i talo |
| 5. E Solofa | 18. A 1991 |
| 6. A pauni | 19. E faamamalu Vagst |
| 7. A 1900 | 20. A Mauga |
| 8. E Ianuari 1 | 21. I Faatuatua |
| 9. E 1926 | 22. I 13,000 |
| 10. I 1929 | 23. E 'aitaumalele |
| 11. E faamata'u Iapani | 24. E fono tele |
| 12. I 1955 | 25. I Rokeuaina T 1722 |
| 13. I afa | |

FAATULAGAGA O PASI

15-17 e sa'o—FEOLOOLO C— C C+

18-20 e sa'o—LELEI B— B B+

21-23 e sa'o—LELEI TELE A— A

24-25 e sa'o—MAOA'E A+

NIUPAC PUBLICATION

Email: ola-niupac@gmail.com
Phone: 02102567412/ 0210364322
Facebook: [ola—puletini—a'oga](https://www.facebook.com/ola-puletini-a'oga)
Website: www.ola888.com

Editor

Levi Tavita ~ ltavita8@gmail.com

Management

Chairperson ~ Muliagatele Dr Vavao Fetui

Secretary ~ Salā Dr Sali Aukuso

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA acknowledges and defends the rights of other copyright holders whose material we borrow and acknowledge accordingly.

NIUPAC 2011